



SIARAN MEDIA

SKUAD WAJA SISWA TINGKAT KESEDARAN BELIA BERKAITAN JENAYAH DAN KEGANASAN

KUALA LUMPUR, 18 SEPTEMBER – Kementerian Pembangunan Wanita, Keluarga dan Masyarakat (KPWKM) melalui Jabatan Pembangunan Wanita (JPW) dengan kerjasama Universiti Teknologi Malaysia (UTM) hari ini menganjurkan Program Skuad Waja Siswa Peringkat Wilayah Persekutuan yang telah disempurnakan YB Datuk Seri Dr. Noraini binti Ahmad, Timbalan Menteri Pembangunan Wanita, Keluarga dan Masyarakat di Dewan Tan Sri Anuddin Wahid, UTM Kuala Lumpur.

Program ini bertujuan untuk memperkasakan komitmen Kerajaan MADANI dalam usaha meningkatkan kesedaran kepada seluruh masyarakat khususnya golongan mahasiswa di peringkat institusi pengajian awam dan swasta. Penganjuran program ini juga selaras dengan agenda pelan tindakan *Women, Peace And Security* (WPS) di mana Skuad Waja merupakan wadah dalam menyahut usaha dan pelaksanaan tindakan dalam melindungi serta memastikan kesejahteraan wanita.

Menerusi program ini isu-isu keganasan khususnya terhadap wanita disebarluaskan dalam usaha menyokong kempen menangani keganasan terutamanya dalam kalangan mahasiswa. Program ini menghimpunkan kira-kira 350 peserta yang hadir bagi memberi sokongan serta menunjukkan keprihatinan terhadap isu berkaitan.

Menurut statistik jenayah seksual bagi bulan Januari hingga April 2025 yang dikeluarkan oleh Polis Di Raja Malaysia (PDRM) bagi peringkat umur 18 tahun ke atas, sebanyak 1,300 kes melibatkan kes rogol, sumbang mahram, cabul kehormatan dan gangguan seksual dilaporkan. Angka dan statistik ini disifatkan sebagai cerminan keampuhan fungsi institusi sosial dalam menyampaikan pendidikan kesihatan seksual yang efektif terutamanya kepada golongan mahasiswa.

Justeru dengan melihat kepada peningkatan kes jenayah di kalangan pelajar IPT, maka pada tahun 2025 keahlian Skuad Waja dalam kalangan siswa di IPT telah diperluaskan bertujuan bukan sahaja untuk menyantuni golongan belia serta memberi kesedaran tetapi juga untuk meningkatkan pengetahuan berkaitan jenayah yang sering berlaku terutamanya kepada Wanita. Sehingga kini keahlian Skuad Waja daripada kalangan siswa adalah seramai 2,129 orang dari seluruh negara.

Modul Skuad Waja (Wanita Anti Jenayah) telah dibangunkan oleh Jabatan Pembangunan Wanita (JPW) memfokuskan kepada penyampaian ilmu dan kemahiran asas psikologi serta slot informasi jenayah bertujuan untuk meningkatkan pengetahuan mengenai isu-isu keganasan khususnya terhadap wanita.

KPWKM berharap menerusi penganjuran Program Skuad Waja Siswa ini akan memberi manfaat kepada para siswa dalam meningkatkan kesedaran dan pemahaman tentang isu penganiayaan terhadap wanita. Program ini juga berperanan sebagai platform penyaluran maklumat yang tepat kepada siswa sebagai pelapis kepimpinan negara.

Turut hadir adalah YBhg. Datuk Che Murad Sayang, Ketua Pengarah JKM, YBhg. Datuk Shukur bin Abdullah, Ketua Pengarah Lembaga Penduduk dan Pembangunan Keluarga Negara, YBrs Puan Hanani binti Sapit, Ketua Pengarah Jabatan Pembangunan Wanita, YBrs Profesor Dr. Shamsul Bin Sahibuddin, Menjalankan Fungsi Ketua Kampus Universiti Teknologi Malaysia (Cawangan Kuala Lumpur) serta Pegawai-Pegawai Kanan Kementerian, Jabatan dan Agensi di bawah KPWKM.

####

**UNIT KOMUNIKASI KORPORAT
KEMENTERIAN PEMBANGUNAN WANITA, KELUARGA DAN MASYARAKAT
18 SEPTEMBER 2025**